

इवनिंग डोगरी न्यूज़ बुलेटिन

समे .18:15 Hrs

<><><><><><>

Headlines

1. प्रधानमंत्री नरेंद्र मोदी होंरें बेंगलुरु थमां त्रै वंदे भारत रेल गड्डिएं गी शुरू करोआया, श्री मोदी होंरें वर्चुअल ढंग्गै नै झंडी दस्सियै कटड़ा-अमृतसर एक्सप्रेस रेल सेवा दा बी शुभारम्भ कीता।
2. केंद्री मंत्री डॉ. जितेंद्र सिंह होंरें आखेआ ऐ जे कटड़ा बड़ी तेजिया कन्नै जम्मू-कश्मीर दी सैलसफा राजधानी दे तौर पर उभरियै सामने आवा'रदा ऐ ते संपर्क स्थूलतें च बाददे कन्नै इत्थे सैलानिएं दी आमद च खरा मता बाददा होग।
3. किशतवाड़ जिले दे दूल क्वार इलाके च सुरक्षाबलें ते आतंकवादिएं बश्कार टाकरा जारी ऐ।
4. जम्मू नगर-निगम आसेआ "हर घर तिरंगा" अभियान दे तैहत अज्ज बड्डलै जम्मू च 'स्वच्छ जम्मू रन-2025' दा आयोजन कीता गेआ।
5. ते श्री बुड्ढा अमरनाथ जी दी सालाना जातरा सम्पन्न, भगवान शिव दी पवितर छड़ी मुबारक गी अज्ज वापस दशनामी अखाड़ा पुंछ लेई आंदा गेआ।

<><><><><><>

PM-Bengaluru

प्रधानमंत्री नरेंद्र मोदी होंरें अज्ज बेंगलुरु च कई विकास परियोजनाएं दा उद्घाटन कीता ते केइयें दा नीह पत्थर रक्खेआ। अज्ज बेंगलुरु पुज्जने मगरा प्रधानमंत्री होंरें बेंगलुरु ते बेलागावी मझाटै वंदे भारत रेल सेवा गी झंडी दस्सियै रवाना कीता। एहदे अलावा प्रधानमंत्री होंरें 2 होर वंदे भारत रेल सेवाएं गी वर्चुअल ढंग्गै नै झंडी दस्सियै शुरू करोआया जेदे च कटड़ा ते अमृतसर मझाटै ते नागपुर ते पुणे मझाटै वंदे भारत एक्सप्रेस रेल गड्डियां शामिल न। कटड़ा ते अमृतसर बश्कार वंदे भारत एक्सप्रेस रेल गड्डी भारत दे आधुनिक रेल राबते च इक होर संगेमील साबत होग। प्रधानमंत्री हुंदे दफ्तरै च राज्यमंत्री डॉ. जितेंद्र सिंह होंरें इस गैह दा सोआगत करदे होई आखेआ जेएहदे कन्नै कटड़ा दे कन्नोकन्नी पूरे जम्मू-कश्मीर च सैलसफा गी बढ़ावा थहोग। उनें आखेआ जे कटड़ा, जम्मू-कश्मीर दी प्रमुख सैलसफा आहली थाहर बनियै उभरा'रदा ऐ ते इस राबते कन्नै सैलानियें दी आओजाई खरी गिनतरी च बाददा दिक्खने गी लब्बोग। इस मौके पर बोलदे होई उनें गलाया।

तोआई, उपराज्यपाल मनोज सिन्हा होंरें इक सोशल मीडिया पोस्ट राहें अमृतसर ते श्री माता वैश्वो देवी कटड़ा स्टेशन बश्कार नमी वंदे भारत रेल सेवा लेई प्रधानमंत्री नरेंद्र मोदी हुंदा आभार जताया।

<><><><><><>

Kishtwar Encounter

किश्तवाड़ जिले दे दून-क्वार इलाके च सुरक्षाबलें ते पाकिस्तानी आतंकवादिएं बश्कार टाक्करा जारी ऐ। साढ़े जिला संवाददाता कैलाश नाथ मूजब, हासल होई दिएं खूफिया जानकारिएं दी बिनाह उप्पर सुरक्षाबलें आसेआ चलाए गेदे अभियान दरान एह टाक्करा शुरु होआ। मन्नेआ जा करदा ऐ जे द'उं पाकिस्तानी आतंकवादिएं गी सुरक्षाबलें अपने घेरे च फसाई लैते दा ऐ ते उं'दे सफाये लेई सुरक्षाबलें दे जोआन पूरी दलेरी ते मुस्तैदी कन्नै डटे दे न। इस बारे होर मती जानकारी देआ करदे न साढ़े किश्तवाड़ संवाददाता

<><><><><><>

Jammu Dekho Sabko Dikhao

जम्मू दे सैलसफा मैहकमे नै “जम्मू देखो, सबको दिखाओ” नां कन्नै इक्क दिलचस्प अभियान रम्भेया ऐ, जेदे राहें कन्टेंट क्रिएटर्स ते इन्फ्लुएंसर्स गी साद्दा दिता गया जे ओह खिते दियें ऐसी बेगौरी थाहरें दा पता लाइयै उनेंगी लोकें दे सामने आनन, जेड़ियां कुदरती खूबसूरती कन्नै भरोची दियां न। जम्मू दे आध्यात्मिक, सांस्कृतिक, कुदरती ते विरासत आकर्षणें गी उजागर करने दे मकसद कन्नै रम्भे गेदे इस अभियान दे तैहत बड़ी रियायती दरें पर बक्ख-बक्ख थारें दे दौरे दी सेवा उपलब्ध करोआई जाग। इस दरान प्रतिभागी बड़े उच्चे म्यार आहली सामग्री जियां वीडियो, रील ते ब्लॉग्स बगैरा तयार करदे होई अपने अनुभव बी इन्दे कन्नै सांझे करगंन। प्रतिभागियें दे रौहने-बौहने, यात्रा ते साज-समेयान दा सारा बंदोबस्त सैलसफा मैहकमे आसेया कीता जाग। मुख्य भरै दे क्रिएटरें गी एह साद्दा दिता गया ऐ जे ओह इस अभियान कन्नै जुड़न ते जम्मू दी खूबसूरती गी दुनिया तगर पजाने दा कम्म करन।

<><><><><><>

Dogri-Academy

साहित्य अकादमी नै बरै 2026 दे युवा पुरस्कार लेई मान्यता हासिल सब्भनें 24 भाशाएं च पैहली जनवरी 2026 गी 26 बरें तगर ते औहदे थमां घट्ट उम्मी दे युवा भारती लेखकें दिएं कताबें गी भेजने दा साद्दा दिता ऐ। लेखक दी उम्र 35 बरें जां फी औहदे थमां घट्ट होनी लोइचदी। दरखास्त जमा करोआने दी खीरी तरीक 31 अगस्त 2025 ऐ। होर जानकारी लेई इच्छुक आवेदक साहित्य अकादमी दी वेबसाइट www.sahitya_akademi.gov.in पर दिक्खी सकदे न।

<><><><><><>

Swacch-Run

जम्मू नगर-निगम आसेआ अज्ज जम्मू च स्वच्छ जम्मू द्रौड़-2025 दा आयोजन कीता गेआ। एह द्रौड़ डिविजनल कमिशनर जम्मू रमेश कुमार ते जेएमसी दे कमिशनर डॉ. देवांश यादव हुंदी मौजूदगी च बाहू प्लाजा थमां शुरु होई ते रेलवे स्टेशन, पनामा चौक, जम्मू यूनिवर्सिटी, गुज्जर नगर ते जीवल चौक थमां हुंदे होई बाहू प्लाजा च जाइयै सम्पन्न होई। एह द्रौड़ 2 श्रेणियें-10 किलोमीटर ते 5 किलोमीटर च आयोजित कीती गेदी ही जेदा मकसद मकामी लोकें गी साफ-सुथताराई बनाई रखने ते सेहतमंद जीवन जीन लेई प्रेरित करना हा। इस मौके पर बोलदे होई जम्मू दे डिविजनल कमिशनर रमेश कुमार होरें गलाया।



Kounsarnag-HGT

देशभक्ति दी मजबूत भावना दा प्रदर्शन करदे होई पवितर कौसरनाग जातरा दी उच्ची प्हाड़ी किंगर पर बड़े मानें कन्नै तिरंगा झंडा फैहाया गेआ ऐ जेहदे चलदे एह आध्यात्मिक जातरा, राश्ट्री गर्व दे जशन दा प्रतीक बी बनी गई। बर्फीले ठंडे पानी ते हिमालय दिएं उच्चिएं चोटिं आहली एह खूबसूरत घाटी, 'भारत माता की जय' दे नारें कन्नै गूंजी उट्ठी। हर घर तिरंगा अभियान दे तैहत आयोजित इस कार्यक्रमै च ज्हरां बद्धे श्रद्धालुएं हिस्सा लैता जेहड़े इस चुनौतिपूर्ण रस्ते गी पार करदे होई इस ऐतिहासिक पल दे गवाह बने। बड़ी मती उंचाई आहले इस इलाके च तिरंगा फैहाया जाना नां छड़ा आस्था दा, सगुआं एकता दा बी शक्तिशाली प्रतीक साबत होआ ऐ।



Tiranga-Bike Rally

पुंछ पुलसै जिला प्रशासन पुंछ दे सैहयोग कन्नै अज्ज देशभक्ति ते राश्ट्री गर्व दी भावना दा जशन मनाने दे मकसद कन्नै इक बड़ी तिरंगा बाईक रैली दा आयोजन कीता। पुंछ दे डिप्टी कमिशनर अशोक कुमार शर्मा होरें पुंछ दे एसएसपी शफकत हुसैन हुंदी मजूदगी च जागर्ते दे पुंछ आहली सरकारी हायर सकेंडरी स्कूल थमां इस रैली गी झंडी दस्सियै शुरु करोआया। एह रैली जिले दे बक्ख-बक्ख हिस्सें जि'आं कनुईयां, खनेतर, कलाई ते डिंगला थमां हुं दे होई जिले दे स्पोर्ट्स स्टेडियम पुज्जियै संपन्न होई गई। खरी मती गिनतरी च मुकामी लोकें, सरकारी मलाजमें ते सुरक्षाबलें दे जवानें एहदे च हिस्सा लैता ते भाईचारे ते देशभक्ति दा भावना दा प्रदर्शन कीता। इस मौके पर बोलदे होई पुंछ दे डिप्टी कमिशनर अशोक कुमार शर्मा होरें आखेआ



Buddha-Amarnath Yatra

श्री बुड्ढा अमरनाथ जी दी सलाना जातरा अज्ज संपन्न होई गई ऐ। एहदे शा पैहले भगवान शिव हुंदी पवितर छड़ी मुबारक गी त्र'उं दिनें तगर श्री बुड्ढा अमरनाथ जी दे मंदरै च रक्खने परैन्त अज्ज वापस श्री दशनामी अखाड़ा पुंछ लेई आंदा गेआ। बम-बम भोले ते हर हर महादेव दे जयकारें च पवितर छड़ी गी श्री बुड्ढा अमरनाथ जी मंदरै थमां लेता गेआ जित्थे स्वामी विश्वात्मानंद सरस्वती जी होरें वैदिक मंत्रोच्चार दे कन्नै छड़ी विद्या पूजन कीता। इस मौके उप्पर खरी मती गिनतरी च श्रद्धालु ते साधु-संत उत्थे मजूद हे। दशनामी अखाड़ा पुंछ पुज्जने पर उत्थे पवितर छड़ी मुबारक दा जोरें-शोरें सोआगत कीता गेआ। इस सरबंधे च आकाशवाणी समाचार कन्नै गल्ल करदे होई स्वामी विश्वात्मानंद सरस्वती जी होरें आखेआ

